



黃金雨

人講臺灣是寶島，地理好、風景嬌，雖然熱天的天氣有淡薄仔翕熱，毋過嘛生炭出臺灣百百款的植物。

佇我猶未讀小學的時陣，若是拄著禮拜，透早，我就綴阿母去菜市仔買菜。去菜市仔的路裡，阿母牽我的手，那行那比路邊的野花、野草，教我認捌遮的植物。

「這是草霸王；彼是刺查某，愛細膩毋通予伊纏牢咧。彼穰叫做烏甜仔，葉仔恰結的子攏會當挽來食。」我指一穰花問阿母：「彼一粒一粒、紅紅的是啥物花？有夠古錐呢！」「彼叫做圓仔花，佇路邊常在會當看著伊。」

細漢，我上愛綴序大人看歌仔戲，看著搬戲的花旦妝甲嬌噹噹，我嘛會擲香綴拜，共頭毛頂插甲全全攏是圓仔花，當做家已是歌仔戲的花旦，走去阿母面頭前唱七字仔。變鬼變怪閣牛聲馬喉，阿母幌頭笑講：「你喔！真正是圓仔花毋知稜！」

等到我讀小學，我上恰意的就是運動埕邊的黃槐樹。彼排黃槐樹，差不多有八十公尺長、兩樓懸。熱日時仔，會開甲規穰樹仔攏是黃色的花。下課的時，定定恰同窗走去樹仔跤迤迤。涼涼的風微微仔吹來，帶來花的清芳，閣有真茂的樹葉仔鬥遮日，真正是天然歇涼的好所在。

有一工的熱天下晡，當咧上課，雄雄落一陣有夠大的西北雨，逐家攏予大雨嗒去看外口，無張持有人大聲喝：「哇！有夠嬌的！」

原來，這陣大雨共規排黃槐樹的花拍落來，黃錦錦的花蕊，綴雨水落落來，閣拄著透大風，花蕊就會予風吹甲懸懸懸，若像尾蝶仔咧跳舞全款。花蕊起起落落，親像咧落黃金雨全款。全班的同學攏袂記得猶咧上課，逐家攏走去映佇窗仔門邊，連老師嘛做伙來欣賞這個難得的美麗景緻呢！

到今，一年四季攏有人相招去看花，像春天的斑芝花、熱人的蓮花、秋天的金針花恰寒人的梅花。雖然遐的花攏真嬌，毋過佇我心目當中，上嬌的猶是細漢看著的彼陣美麗的黃金雨。

作者：李筱雯

☆詞彙學習☆

【翕熱】hip-juah/hip-luah：悶熱。

【生炭】senn-thuànn/sinn-thuànn：生育繁殖。

【禮拜】lé-pài：特指星期天。

【擲香綴拜】

giáh-hiunn-tuè-pài/giáh-hiunn-tè-pài：無主見的人盲目跟隨他人行事。

【牛聲馬喉】gû-siann-bé-âu：大聲吆喝。

【幌頭】hàinn-thâu：搖頭。

【同窗】tông-tshong：同學。指在同一個班級中或學校裡一起求學的伙伴。

【嗒】siànn：引誘。

【無張持】bô-tiunn-tî：突然、冷不防。

【尾蝶仔】bué-iàh-á/bé-iàh-á：蝴蝶。